

## **Petnaest godina postojanja i rada Udruženja (2001. – 2016.)**

### **JUBILEJ I ZAVIDNI REZULTATI**

Težište rada Udruženja od osnivanja 2001. godine do danas bilo je na realizaciji programskih ciljeva i plana rada Udruženja.

Ciljevi i djelatnost Udruženja su:

- organizovanje naučnih skupova iz oblasti proučavanja historije BiH i izrada ekspertiza i publikacija iz te oblasti;
- preduzimanje mjera i aktivnosti za afirmaciju borbe za BiH 1992.-1995. godine, kao i antifašističke borbe i djelovanje u pravcu zaštite od kriminalizacije pripadnika OS RBiH i intencije da se žrtva i agresor izjednače, odnosno, da se odbrambeni rat tretira kao građanski;
- stvaranje uslova za primjenu svih demokratskih metoda borbe, imajući u vidu postojeće stanje, pri čemu težište imati na: konstitutivnosti naroda i građana, ravnopravnoj primjeni Anexa VII Mirovnog sporazuma iz Dejtona i zaštiti svih vrsta ljudskih prava i dr.;
- preduzimanje mjera na zaštiti prava članova Udruženja i pružanje pomoći članovima;
- afirmisanje i podržavanje obilježavanja značajnih događaja i datuma iz historije BiH (težišno događaja iz rata 1992.-1995.g.);
- iniciranje aktivnosti na jedinstvenom sistemskom regulisanju statusa svih učesnika Odbrambeno-oslobodilačkog rata 1992.-1995.g.;
- stvaranje uvjeta za što bolju saradnju i koordinaciju sa svim institucijama i udruženjima koje u svom radu imaju naglašenu *Bosansku crtu*, a naročito sa boračkim udruženjima i udruženjima drugih populacija unesrećenih agresijom na BiH, u cilju efikasnijeg rada i zaštite interesa članova Udruženja;
- Izdaje časopise i drugu stručnu literaturu u skladu sa Zakonom o izdavačkoj djelatnosti.

Udruženje je u proteklim godinama radilo na afirmaciji i valorizaciji tekovina borbe za BiH.

## 1. ORGANIZOVANJEM, PRIPREMANJEM I ODRŽAVANJEM OKRUGLIH STOLOVA NA TEMU:

1. Okrugli sto „Operacija Kupres“, u Bugojnu 2003. godine;

2. Okrugli sto „Vrijednosti odbrane Bosne i Hercegovine“, 2004. god.;

3. Okrugli sto na temu „Memorija rata“, 2005. godine, sa osnovnom porukom - da se ne zaboravi što nam se desilo, da se imenuju krivci, da se istaknu najveće tekovine ostvarene u ratu i da se ne zaborave oni koji su podnijeli najveći teret i žrtve u ratu.

Traumatična historijska iskustva su narodima Bosne i Hercegovine ostavila specifičnu kulturu pamćenja, čuvanja kolektivnih uspomena i njihovog 'skladištenja' u kulturno pamćenje. Ona su se vijekovima čuvala u usmenoj tradiciji, narodnim pjesmama, baladama, legendama, u kultu predaka (groblja), a u novije vrijeme se pominju kroz komemoracije, godišnjice, spomenike, obilježja, kulturno i umjetničko stvaralaštvo, knjige, časopise, filmove i medije, sprečavajući tako zaborav.

Takvo kulturološko i političko pamćenje prošlosti ima velikog utjecaja na svijet današnjice. Danas se u Bosni i Hercegovini, kao i u drugim zemljama regiona, naporedo odvijaju procesi i prirodnog, i stimuliranog zaboravljanja događaja iz prošlosti, pothranjivanog pogrešnim stavom da će zaboravljanje i zanemarivanje događaja i iskustava iz najbliže prošlosti obezbijediti istovremeno bržu i efikasniju društvenu tranziciju i pomirenje naroda.

Arhaična narodna kultura važila je za čuvara etničkog ili nacionalnog identiteta, te je, stoga, uživala veliki ugled. I razdoblje socijalizma je imalo sličan efekat tradicionalizacije, jer je prisiljavalo ljude da se oslanjaju na arhaične modele u privređivanju i snalaženju u svakodnevnom životu.

Ova dva procesa i dalje nastavljaju da djeluju kao spore i dugotrajne tendencije u nevidljivim, ali tim važnijim mentalnim strukturama i sistemima vrijednosti, kod kojih tradicija igra veliku ulogu, koji su sinkretički i koji sporo usvajaju novine. Zbog toga se, s velikom izvjesnošću, može predvidjeti da će «fasadna modernizacija» BH društva biti proces površnog prihvatanja i asimiliranja zapadnih mjerila u svakodnevnom životu, ali da neće izvršiti promjenu odgovarajućih načina ponašanja i stavova, vrijednosti, normi i pretpostavki koje bi to podrazumijevale;

4. Okrugli sto „Odbrana Sarajeva“, 2005.godine, u organizaciji Kantonalnog ministarstva za boračka pitanja Sarajevo;

5. Pružili smo pomoć i uzeli učešća u održavanju okruglog stola u organizaciji Kantonalnog odbora Travnik Udruženja za TEBE BiH, na temu „Moralne snage Vlašičke operacije“, 2005.godine;

**6.** Okrugli sto „Uloga i značaj Teritorijalne odbrane R BiH u organizaciji, pripremi i odbrani BiH i formiranju A R BiH“, 2006. godine.

Povod i cilj održavanja.

Okrugli sto sa naslovljenom temom se održava povodom 14. godišnjice formiranja, razvoja i djelovanja Armije Republike Bosne i Hercegovine tokom odbrambeno-oslobodilačkog rata 1992.-1995. godine. Cilj je da se doprinese daljem osvjetljavanju i argumentovanju presudne važnosti političkih odluka i zakonodavne regulative Predsjedništva i Vlade R BiH o transformaciji postojećeg sistema i raspoloživih snaga Teritorijalne odbrane u državotvorni vojni faktor odbrane R BiH. Cilj je, također, da se u kontekstu međunarodnog priznanja R BiH i izvršene oružane agresije, uz prethodno enormno onesposobljavanje njenog mirnodopskog sistema odbrane (raznovrsnim metodama Specijalnog rata), još više osvjetli uloga i doprinos snaga teritorijalne odbrane i policije MUP-a u početnoj fazi odbrane od agresije, te u formiranju, razvoju i djelovanju Armije R BiH. Sve to je ostvarivano u uslovima krajnje nepovoljnog odnosa snaga odbrane naspram angažovanih snaga agresora, kao i evidentnih krupnih grešaka međunarodne zajednice u pogledu izvršavanja njenih obaveza u odnosu na odbranu države Bosne i Hercegovine kao članice Ujedinjenih nacija;

**7.** Okrugli sto „Heroji u bijelom“ - sjećanja na Vlašičku operaciju, 2006. godine. Organizator i izvođač Kantonalni odbor Udruženja «ZA TEBE BiH» Travnik.

Uz Oružane snage Armije i MUP-a R BiH, koji su u minulom četverogodišnjem izuzetno specifičnom i teškom ratu branili stanovništvo i državu Bosnu i Hercegovinu od oružane agresije, bili su rame uz rame i zdravstveni radnici. Oni su djelovali u postojećim i improviziranim ratnim bolnicama, u brojnim sanitetskim jedinicama Armije, u raznovrsnim prihvatnim liječilištima, na mjestima gdje su se dešavali masovniji masakri stanovništva itd. Ipak, ta svakodnevna borba "HEROJA U BIJELOM" poratno je naučno i empirijski nedovoljno istraživana i afirmisana.

Među važnim ciljevima pripreme i održavanja ovog okruglog stola je i potreba da se i na ovaj način doprinese naučnoj spoznaji i općoj istini o skoro neopisivoj dramatici spašavanja života i zaštite zdravlja ljudi od nemilosrdnih ratnih ugrožavanja. To je jedna od najvažnijih stavki u cjelokupnoj memoriji minulog rata, koja se mora štiti od zaborava, a to se najbolje postiže istraženim, napisanim, publikovanim i u javnosti afirmisanim istinama;

**8.** Okrugli sto „Rukovođenje i komandovanje u OS R BiH u pripremi i vođenju rata 1991.-1995. godine.“, 2007. godina;

**9.** Okrugli sto „Opsada i odbrana Sarajeva od agresije 1992.- 1995. godine“, 2007. godine., gdje su naši članovi učestvovali sa svojim referatima;

**10.** Okrugli sto „Žena u ratu 1992.-1995. godine“, 2008. godina, u organizaciji Kantonalnog udruženje Kantona Sarajevo;

**11.** Okrugli sto „Značaj tunela DB za odbranu Sarajeva i Bosne i Hercegovine“, 2009. godina, u organizaciji Kantonalnog udruženje Kantona Sarajevo;



Sarajevo, 30 juni 2005.: Okrugli sto "Memorija rata"; Asaf Džanić i general Hasan Efendić

**12.** U okviru manifestacije „*Odbrana BiH, Igman 2009*“, koja je održana od 3. do 22. augusta 2009. godine, dana 3. augusta 2009. godine, Udruženje je, u saradnji sa Federalnim i Kantonalnim ministarstvom za pitanja boraca organiziralo okrugli sto, pod naslovom „Značaj igmanskog bojišta za odbranu Sarajeva i Bosne i Hercegovine“;

**13.** U okviru manifestacije „*Odbrana BiH, Igman 2010*“, koja je održana od 3. augusta do 21. septembra 2010. godine, 21. septembra 2010. godine Udruženje je organiziralo okrugli sto, pod naslovom „1993. – PRELOMNA GODINA RATA ZA ODBRANU BOSNE i HERCEGOVINE“. Ocjena je organizatora da su uvodnim izlaganjima i diskusijom, koja je slijedila, napravljeni značajni pomaci u poznavanju vojnih, političkih, geopolitičkih, socijalnih i drugih uslova u kojima su vođena borbena dejstva na bh. ratištu u 1993. godini, zbog kojih je ova godina, sa stanovišta snaga i politike koja je branila opstanak Bosne i Hercegovine kao države, analizirana kao prelomna godina;

**14.** Udruženje je 10. februara 2010. godine, u Bošnjačkom institutu u Sarajevu, održalo okrugli sto o separatu „*Razvoj i rast odbrambeno-oslobodilačkih snaga u periodu 1992.-1995.*“;

**15.** Udruženje je organiziralo okrugli sto/panel, pod nazivom „*Ratni bilans u Bosni i Hercegovini: kumulativno dejstvo naslijeđa*“, koji je održan u Bošnjačkom institutu u Sarajevu, 23. juna 2011. godine.

Učesnici okruglog stola su ocijenili da je rat u BiH upostavljen i kao rat za teritorije i promjenu/reviziju granica. U historijskom momentu u kome su nacionalne elite legitimirale nasilno prekrajanje granica, oprečne teritorijalne aspiracije su postale dovoljan razlog za rat. Tada se teritorijalni razlog stopio sa nacionalno-vjerskim, da bi potom udruženim dejstvom odredili buduće sadržaje i forme rata.

Razmotrena je uloga sukobljenih oružanih formacija, a posebno uloga ARBiH u vođenju rata; problem strategije vođenja rata; problemi u njenom organiziranju, a dat je, djelimično, i osvrt na pitanje - da li je ona mogla učiniti više u minulom ratu;

**16.** U organizaciji Udruženja ZA TEBE BiH Srednjobosanskog kantona 2011. godine održan je okrugli sto na temu: „Džehenem u Srednjoj Bosni“ - Ratna dešavanja 1993. godine;

**17.** Okrugli sto „Stradanje Bošnjaka Velike Bukovice i Bandola, na travničkoj općini“, u Velikoj Bukovici 2011. godine;

**18.** Udruženje, u saradnji sa Bošnjačkim institutom, je organizovalo i održalo okrugli sto na temu: „Bilans rata u BiH“, juni 2011. godine;

**19.** „Predratna 1991. i ratna 1992. - SREDNJA BOSNA PRKOSNA“, okrugli sto održan 14. aprila 2012. u Travniku;

**20.** U Sarajevu, 19. septembra 2012. godine održan okrugli sto na temu: “PARADRŽAVNE TVOREVINE U FUNKCIJI RATNOG UNIŠTAVANJA RBiH i kao izvorište poratnih opstrukcija provedbi DEJTONSKOG MIROVNOG SPORAZUMA i njenog uključivanja u EVROPSKU UNIJU“.

Brojna dosadašnja naučna sagledavanja i empirijska istraživanja ukazuju da su stvorene paradržavne tvorevine s početka rata (RS, HZHB i APZB) bile ključni oslonci izvođenja i kamufliiranja oružane agresije na RBiH. Užasne posljedice su poznate, naročito enormne ljudske žrtve genocidne politike i masovnih etničkih progona, te rastakanja države RBiH kao priznate članice Ujedinjenih nacija i njenog multietničkog društvenog bića.

Međutim, još uvijek je nedovoljno osvijetljen realitet ratnog postojanja paradržavnih tvorevina kao suštinskog izvorišta protivrječnosti i pristrasnosti Dejtonskog mirovnog sporazuma i brojnih opstrukcija njegovom dosljednom provođenju i usvršavanju u pravcu Evropskog integrisanja BiH;

**21.** Obilježavajući značajnije datume i događaje koji su proistekli iz posljednjeg rata, dajući akcenat na godišnjicu 7. korpusa i ARBiH, 13.04.2013. godine Udruženje za zaštitu tekovina borbe za BiH SBK održalo je okrugli sto u Travniku na temu „Srednja Bosna od Washingtona do Dayton“;

**22.** Okrugli sto „Meokrnje-simbol borbe protiv fašizma“, u Travniku 2013. godine;

**23.** U Sarajevu, 25. oktobar 2013. godine održan okrugli sto na temu: “Sanitetska služba 1. korpusa ARBiH 1992.-1995.“ u organizaciji Kantonalnog udruženje Sarajevo;

**24.** Okrugli sto „Herojska odbrana Prusca“, u Pruscu 2015. godine;

**25.** Okrugli sto „Borbe za Karaulu 1992. i 1995. godine“, u Karauli 2015. godine;

**26.** Okrugli sto „Nikad više Srbobran, Donji Vakuf slobodan“, u Donjem Vakufu 2015. godine;

Dana 27. marta 2015. godine održan simpozij na temu: "Obaveza je i čast braniti Bosnu i Hercegovinu". Vrijeme od 20 godina od završetka agresije na Bosnu i Hercegovinu je da se sa te distance ukaže na:

- Kontinuitet postojanja i opstojnosti Bosne i Hercegovine kao države, Bosne i Hercegovine u okviru drugih država (Osmansko carstvo, Austro-Ugarska, Kraljevina Jugoslavija, SFRJ) i Bosne i Hercegovine kao nezavisne, suverene i međunarodno priznate države, članice Ujedinjenih nacija.
- Planiranu, pripremljenu i izvedenu agresiju na Bosnu i Hercegovinu, članicu UN, pokazujući i dokazujući ko je izvršio agresiju i sa kojim ciljem, i ko je u Bosni i Hercegovini neposredno kolaborirao sa agresorom.
- Apсурdnu tezu da je u Bosni i Hercegovini od 1992. - 1995. bio građanski rat, što uporno ponavljaju oba agresora, a i određeni subjekti i pojedinci iz međunarodne zajednice.
- Činjenice ko je i kako branio Bosnu i Hercegovinu i njene građane, koje su snage činile okosnicu u pripremi i odbrani od agresije u kontinuitetu od 1992. do 1995. godine.
- Posljedice agresije na Bosnu i Hercegovinu, zločin protiv čovječnosti, genocid, urbicid, kulturocid i sve druge posljedice.
- Moralnu snagu odbrane od agresije.
- Pokušaj izjednačavanja zločina u toku agresije i opovrgne teze o izjednačavanju krivice za počinjene zločine od strane agresora i njegovih kolaboracionista i branilaca Bosne i Hercegovine. Ne mogu se isto tretirati osmišljeni, planirani, organizovani i izvršeni ratni zločini velikih razmjera, uključujući i genocid agresora i sporadični, ponegdje i grupni ratni zločini branilaca. Nisu isto masovni zločini agresora, uključujući i genocid, u kome je pobijeno više hiljada civila i zarobljenih branilaca i pojedinačno i grupno ubistvo od strane branilaca.
- Potvrdu masovnih zločina i genocida utvrđenih pred međunarodnim i domaćim sudovima.
- Zločin genocida u Srebrenici.
- Činjenicu da u Bosni i Hercegovini postoje i u poratnom periodu snage koje žele uništiti Bosnu i Hercegovinu. To rade i danas, a radiće i ubuduće dok konačno ne shvate da Bosnu i Hercegovinu ne mogu uništiti, jer Bosna i Hercegovina je neuništiva.

Potrebu da mobilishemo sve raspoložive snage kojima je u interesu Bosna i Hercegovina za njenu odbranu, svim sredstvima, pa, ako treba, i borbom.

## 2. ODRŽANE JAVNE TRIBINE:

1. „Hvala Generale“, 2004. godine u Travniku, povodom godišnjice smrti generala Mehmeda Alagića,

2. „Kupreška operacija“, 2005. godine u Bugojnu,

3. „Obrana Bugojna jula 1993. godine“, u Bugojnu,

4. U Domu mladih Kulturno-sportskog centra „Skenderija“, u Sarajevu, naše Udruženje je 2. maja 2010. priredilo javnu tribinu o značaju 2. maja 1992. godine za odbranu Sarajeva i Bosne i Hercegovine.

5. U sali Općine Stari Grad u Sarajevu naše Udruženje je 19. maja 2011. godine priredilo javnu tribinu, pod nazivom „Društvena kretanja u arapskom svijetu“.

6. U Bošnjačkom institutu u Sarajevu naše Udruženje je 21. decembra 2010. godine priredilo javnu tribinu, pod naslovom „Vojne aktivnosti Izraela i agresija na Liban i Gazu“.

Okrugli sto je otvoren kratkim dokumentarnim filmom, u trajanju od 15 minuta, koji prikazuje uzroke i posljedice izgradnje betonskog zida koji je podigao Izrael i koji rasijeca palestinsku zemlju, otežavajući i čak onemogućavajući ekonomske i ostale aktivnosti palestinskog stanovništva. Film je producirala organizacija „Mladi Muslimani“, a na tribini je poslužio kao neka vrsta uvodnog izlaganja u aktuelnu situaciju na palestinskim teritorijama.

7. „Dvadeset godina operacije Vlašić“, u Travniku, 2015. godine.

8. „Sedmi korpus-ponos BiH“, u Bugojnu, 2016. godine.



Sarajevo, mart 2004.: Članovi Predsjedništva Udruženja

### 3. IZDAVANJE KNJIGA:

1. „Drugi korpus slobodi pjeva“, izdato 2002. godine, autor brigadir Hasib Mušinbegović;
2. „Pozicija i perspektive boračke populacije“, izdato 2004. god., (Zbornik radova sa okruglog stola održanog 01.07.2003. god. u Sarajevu);
3. „Argumenti i sjećanja o ratu (knjiga I i II), izdato 2006. godine, autor general Fikret Muslimović;
4. „Odbrambena politika u tranzicijskom periodu Bosne i Hercegovine“, izdato 2006. godine, autor general Alija Ismet;
5. „Teritorijalna odbrana kao državotvorni faktor u odbrani od oružane agresije i u formiranju Armije Republike Bosne i Hercegovine“, izdato 2007. godine, (Zbornik radova sa okruglog stola održanog 13.04.2006. godine u Sarajevu);
6. „Sarajevske ruže“, izdato 2006. godine, autor mr. Azra Junuzović;
7. „Elaboracija sjećanja na rat kao zalag za budućnost Bosne i Hercegovine“, (Zbornik radova sa okruglog stola, održanog 26.04.2007. godine);
8. „101 ratna priča“, izdato 2009. godine, autor general Rasim Delić;
9. „Značaj Igmanskog bojišta za odbranu Sarajeva i Bosne i Hercegovine“, (Zbornik radova sa Okruglog stola, održanog 03.08.2009. godine u Sarajevu);
10. „Značaj tunela D-B za odbranu Sarajeva i Bosne i Hercegovine“, (Zbornik radova sa Okruglog stola održanog 24.06.2009. godine u Sarajevu);
11. „Sarajevo - opsada i odbrana 1992.-1995.god.“, autori: general Vahid Karavelić i brigadir Zijad Rujanac, Sarajevo, izdato 2009. godine;
12. „Kako smo branili Bosnu i Hercegovinu“, izdato 2010. godine, autor general Mustafa Polutak;
13. „Specijalni rat“, izdato 2011. godine, autor general Fikret Muslimović;
14. „Paradržavne tvorevine-oslonci uništavanja BiH“, izdato 2011. godine, autor general Hasan Efendić;
15. „Džehenem u Srednjoj Bosni“, izdato 2011. godine. (Zbornik radova sa okruglog stola, održanog 11.04.2011. godine u Travniku);
16. „1993.- Prelomna godina rata za odbranu Bosne i Hercegovine“, (Zbornik radova sa okruglog stola, održanog 21.09.2010. godine u Sarajevu);
17. „Mudžahedini u Bosni i Hercegovini“- borci ili teroristi“, izdato 2012. godine, autor general Hasan Efendić;
18. „Srednja Bosna prkosna“, izdato 2012. godine, (Zbornik radova sa okruglog stola, održanog 14.04.2012. godine u Travniku);
19. „Bilans rata u Bosni i Hercegovini 1992.-1995. godina“, (Zbornik radova sa okruglog stola održanog 23.06.2011. godine u Sarajevu);



**20.** „Srednja Bosna od Washingtona do Deytona ratna 1994. – 1995. godina“, (Zbornik radova sa okruglog stola, održanog 13.04.2013. godine u Travniku);

**21.** „Lažovi i ubice“, izdato 2013. godine, autor general Fikret Muslimović;

**22.** „Zvijezde stajačice: zapisi o djevojkama i ženama iz rata 1941-1945. i 1991-1995.“, izdato 2009. godine, autor Mensur Seferović;

**23.** „48 sati pepela“, izdato 2011. godine, autor Munib Kajmović;

**24.** „Bugojno u odbrani Bosne i Hercegovine 1991.-1993.“, autori: Abdulah Jeleč, Edin Ramić i Besim Ždralović. Sarajevo, izdato 2013. godine;

**25.** „Tunel i još ponešto“, izdato 2014. godine, autor general Rašid Zorlak;

**26.** „Monografija 306/706. brigade ARBiH“, autori: Remzija Šiljak, Munir Karić i Fahr Čamdžić, izdato 2015. godina;

**27.** „Obaveza je i čast braniti Bosnu i Hercegovinu“, izdato 2016. godine. (Zbornik radova sa Okruglog stola, održanog 27.03.2015. godine u Sarajevu).

## 4. IZDAVANJE ČASOPISA „KORAK“

ČASOPIS „KORAK“ od broja 1, koji je izdat 2003. godine, do broja 31, koji je izdat 2013. godine.

Udruženje za zaštitu tekovina borbe za Bosnu i Hercegovinu je 2003. godine pokrenulo izdavanje časopisa „KORAK“. Cilj časopisa je afirmacija tekovina borbe za Bosnu i Hercegovinu u najširem smislu riječi. Premda je časopis zamišljen kao glasilo Udruženja, on je prerastao tu prvobitnu namjeru Izdavača, što se može vidjeti iz sadržaja posljednjih brojeva. Širi se i povećava krug saradnika u svakom broju „KORAKA“, a također i tiraž, koji sada iznosi 1.000 primjeraka po broju.

Namjera Izdavača jeste da se časopis sadržinom i tretmanom obrađivanih tema neposrednije osloni na analize i reagovanja na aktuelna zbivanja od značaja za afirmaciju BiH, aktivnosti boračkih organizacija i udruženja u Bosni i Hercegovini, te da u njegovoj sadržini nađu mjesta svi oni koji baštine i čuvaju tekovine borbe za Bosnu i Hercegovinu.

Najveća prepreka daljnjem razvoju časopisa su neredovni prihodi i neriješeno finansiranje Udruženja kao Izdavača. Zbog toga smo upućeni da podršku za izlaženje časopisa tražimo kod svih kojima je stalo do zaštite tekovina borbe za Bosnu i Hercegovinu i koji shvaćaju značaj ovakve publikacije za afirmiranje rada Udruženja i vrijednosti za koje se ono zalaže.



Akademik prof. dr. Ejup Ganić, Dževad Hadžić i Asaf Džanić

## 5. OBILJEŽAVANJE DOGAĐAJA I LIČNOSTI

Organizirani su časovi historije za učenike osnovnih i srednjih škola na prostorima koji su tokom cijelog trajanja rata za odbranu BiH bili poprište intenzivnih borbenih dejstava. Na ovim časovima historije su vrlo detaljno predstavljeni sadržaji aktivnosti Udruženja i afirmisani napori da se mladim generacijama prenesu iskustva i sjećanja na borbu za odbranu Bosne i Hercegovine. Na ovim časovima su govorili istaknuti komandanti ARBiH.

- Čas historije za učenike Treće gimnazije iz Sarajeva na Nišičkoj visoravni, 2010. godine.
- Čas historije za učenike Pete gimnazije iz Sarajeva na Nišičkoj visoravni, 2011. godine.
- Čas historije za učenike Željezničkog školskog centra iz Sarajeva na Igmanu, 2012. godine.

Dana 02.11.2012. godine Općinski odbor Bugojno bio je nosilac organizacije Časa historije za učenike srednjih škola Bugojna povodom obilježavanja godišnjice Kupreške operacije, a u organizaciji participirali Predsjedništvo Udruženja „Za tebe BiH“ i Kantonalno Udruženje „Za tebe BiH“ SBK.

- U saradnji sa Udruženjem „Druga viteška“ Sarajevo, 03.11.2012. godine, održan je Čas historije na Dujmovskim brdima, na padinama Treskavice, koja je poznata i kao „Bitka za tenkove“. Bilo je prisutno oko 300 učenika osnovnih i srednjih škola iz Sarajeva i boraca 2. Viteške brigade.

- Čas historije za učenike Pete gimnazije iz Sarajeva na Igmanu, 2013. godine.
- Čas historije za učenike Prve bošnjačke gimnazije iz Sarajeva na Nišičkoj visoravni, 2015. godine.

Članovi Udruženja su učestvovali u svim do sada organiziranim pohodima u „Maršu mira“ povodom obilježavanja godišnjice genocida izvršenog nad nedužnim narodom Srebrenice.

Udruženje je organiziralo i izvelo, nadamo se i ubuduće će izvoditi, planinarski pohod „Stazama boraca u OPERACIJI KUPRES“.

Udruženje je do 2012. godine bilo nosilac obilježavanja 8. aprila, Dana Teritorijalne odbrane Republike Bosne i Hercegovine, te je tom prigodom organiziralo svečane akademije u Domu OS BiH i odalo počast na spomen-kompleksima u Sarajevu.

Sudjelovali smo i u obilježavanju 15. aprila – Dana Armije RBiH i pratećim manifestacijama.

Učestvovali smo u obilježavanju borbe u Podveležju, u organizaciji KO Udruženja Mostar.

Udruženje je bilo nosilac obilježavanja godišnjice smrti generala Rasima Delića, komandanta AR BiH, i aktivno je učestvovalo u obilježavanju godišnjica poginulim i umrlim komandantima i drugim starješinama ARBiH.

## 6. REAGOVANJA

Svoje reagovanje smo iznosili onda kada smo ocijenili da se neargumentovano napadaju tekovine borbe za BiH i neposredni učesnici u toj borbi. Karakteristično je da veći dio sredstava informisanja nije objavljivao naša reagovanja. U nekoliko navrata smo direktno pisali i obraćali se institucijama BiH i Federacije i informativnim medijima.



general Rasim Delić, general Mustafa Polutak, Dževad Hadžić, dr. Selmo Cikotić i Sakib Selmanović

Navodimo neka od njih:

- 2006. godine – pismo svim političkim partijama povodom napada na sve značajnije ljude koji su u državnom i vojnom vođstvu išta značili u proteklom ratu;
- 2006. godine – reagovali za provođenje Zakona o zaštiti tajnih podataka (članu Predsjedništva BiH, Sulejmenu Tihću, Predsjedavajućem Vijeća ministara, Adnanu Terziću, Predsjedniku Vlade FBiH, Ahmetu Hadžipašiću, Tužilaštvu BiH, Federalnom Tužilaštvu;
- 2006. godine – reagovali na zabranu Pedi Ešdauna na odluku Odbora za obilježavanje godišnjice smrti Alije Izetbegovića o preimenovanju Međunarodnog aerodroma Sarajevo u ime prvog predsjednika Predsjedništva BiH;
- 2006. godine – reagovali u povodu istupa Milorada Dodika o referendumu u RS;
- 2006. godine – ukazali na neke paralele između rata u BiH ('92.-'95.) i napada na Liban (2006.);
- 2006. godine – reagovali na omaložavanje ličnosti Željka Komšića, kao pripadnika A RBiH i nosioca najvišeg ratnog priznanja „ZLATNI LJILJAN“;
- 2006. godine – reagovali na dodjelu Medalje časti Holandskom bataljonu UN-PROFOR-a u Srebrenici;
- 2006. godine – uputili svim medijima reagovanje na emitiranje dokumentarne serije, pod naslovom „GENERALI“. Supotpisnici devet boračkih krovnih saveza i udruženja.
- 2007. godine – pismo učesnicima sjednice VIJEĆA ZA IMPLEMENTACIJU MIRA U BiH;
- 2007. godine – pismo Vladi Federacije – pismo podrške rješavanja socijalnog i svakog drugog položaja bivših pripadnika ARBiH;
- 2007. godine – Skupštini i Vladi Kantona Sarajevo – podrška inicijativi Vojnog muftije MO BiH da se lokalitet Ratne džamije na Igmanu proglasi spomen-obilježjem branilaca BiH;
- 2008. godine – reagovanje oko izgradnje spomenika (krsta) na Zlatištu, iznad Sarajeva;
- 2008. godine – reagovanje povodom hapšenja trojice Biščana, osumnjičenih za ratni zločin;
- 2008. godine- reagovanje na pisanje dnevne štampe o generalima ARBiH;
- 2008. godine – reagovanje na Hašku presudu generalu Rasimu Deliću;
- 2009. godine - reagovanje o tretiranju Dana Teritorijalne odbrane RBiH;
- 2010. godine - reagovanje na hapšenje dr. Ejupa Ganića, u Londonu;
- 2010. godine - reagovanje o pozadini napada na ministra odbrane BiH Selmu Cikotića;
- 2010. godine - reagovanje o nastavku velikosrpske politike prema BiH;

- 2015. godine - uz podršku i saradnju sa Udruženjem generala Bosne i Hercegovine i Udruženjem za očuvanje i zaštitu imena Teritorijalne odbrane argumentirano smo reagirali na neistine iznijete u filmu Semira Halilovića „Kako je izdata Hercegovina“.

Članovi Udruženja su sudjelovali u nekoliko desetina različitih TV, radijskih i drugih emisija posvećenih historijskim i aktuelnim zbivanjima.

Pružali smo pomoć tužilaštvima, odbrani i sudovima pri procesuiranju ratnih zločina, a posebno smo angažovali pomoći pripadnicima ARBiH optuženim pred Međunarodnim krivičnim sudom u Hagu i sudovima u BiH.

Nastavili smo sa nesebičnom podrškom pripadnicima ARBiH koji se optužuju i procesuiraju pred sudovima BiH.

Naše Udruženje je prepoznatljivo po svom djelovanju, ima kontinuitet u postojanju, radu i djelovanju. Sve to nas obavezuje na organizovaniji i plodonosniji rad.

Učestvovali smo u formiranju koordinacionog odbora boračkih udruženja na nivou Federacije Bosne i Hercegovine. Cilj ovog odbora je jedinstveni nastup svih boračkih udruženja po pitanjima od interesa za očuvanje jedinstvene Bosne i Hercegovine. Također, u koordinaciji sa tim udruženjima, nastojali smo kod nadležnih ministarstava obezbijediti sredstva potrebna za djelovanje Udruženja i ostvarivanje pojedinih njegovih programa. Aktivno smo učestvovali u radu Koordinacionog odbora boračkih udruženja na nivou Federacije Bosne i Hercegovine, koje je svoju djelatnost koncentriralo na pitanja statusa boraca, vojnih penzionera i boračke populacije u cjelini.